



### **Via da god Güstizia - Val Gondas**

Per pudair fabricar oura la via da god tanter Val Gondas e Güstizia sto il cumün cumprar terrain dals proprietaris lung il trassè da la via sül trajet tanter Chat e Chasuo. La suprastanza ha concess il credit necessari per la cumpra da quist terrain.

### **Implant da tir Arduond – proget da sanaziun**

Ils paracullas da l'implant da tir da chatscha in Arduond ston gnir sanats tenor pretaisas da la ledscha da l'ambiant superiura. Dal 2017 vain elavurà il proget da sanaziun e dal 2018 dess l'implant gnir sanà. L'incumbenza per elavurar il proget da sanaziun es gnü surdat al büro Baugeologie und Geo-Bau-Labor AG a Cuaira.

### **Sanaziun via maistra tras Zernez**

Dürant ils prossems ons prevezza l'uffizi da construcziun bassa dal Chantun Grischun da sanar la via maistra tras Zernez. In quist connex sanescha eir il cumün seis provedimaints cumünals sün quist trajet. L'incumbenza sco rapreschantant dal patrun da fabrica sül sector electric e fibr'optica es gnüda surdatta al büro d'indschegner electric Brüniger + Co. AG a Cuaira. La lavur per scriver oura l'incumbenza d'indschegner da fabrica e d'indschegner dal s-chodamaint es gnüda surdatta al büro ewp Ingenieure Planer Geometer a Cuaira. Implü ha la suprastanza cumünala decis che firmas chi dessan gnir invidadas per inoltrar lur offertas per la progettaziun da l'infrastructura cumünala.

### **Iglüminaziun publica - controlla periodica**

Dal 2017 ha darcheu da gnir controllada l'iglüminaziun publica in tuot las fracziuns dal Cumün da Zernez. L'incumbenza per quista lavur es gnüda surdatta a la EE Energia Engiadina a Scuol.

### **Nouva centrala dal s-chodamaint**

La suprastanza ha trattà e decis a man d'üna glista cun propostas, che firmas chi dessan gnir invidadas per inoltrar lur offerta per la fabrica da la nouva centrala dal s-chodamaint a Zernez. Implü es gnüda surdatta la lavur d'indschegner per la fisica da fabrica a la firma Kuster + Partner AG a San Murezzan.

### **Planisaziun da quartier Muglinè - decretaziun finala**

Ils cuosts da procedura e da planisaziun dal plan da quartier Muglinè sun cuntschaints daspö quist inviern. In seguit es gnüda manada tras la procedura da consultaziun in connex culla facturaziun da quists cuosts als possessurs da las parcelas pertoccas. La suprastanza cumünala ha approvà la decretaziun finala dals cuosts, uschè cha la planisaziun da quartier Muglinè, resalv chi nun aintran recuors sülla decretaziun dals cuosts, po gnir serrada giò. Actualmaing s'es landervia a prochatschar la planisaziun e la realisaziun da l'infrastructura publica in quist quartier.

### **Via da quartier Quadratschas**

La suprastanza ha deliberà il credit d'investiziun per surtrar la via da quartier Quadratschas a Lavin cun üna vetta da catram. L'incumbenza es gnüda surdatta a la ditta Implenja Schweiz AG a Zernez.

### **Petizioni dal pövel per salvar la posta a Zernez**

Als 20 favrer 2017 han petizionaris surdat al president cumünal üna petizioni dal pövel chi ha il böt da salvar la posta a Zernez. La petizioni es gnüda suottascritta da 208 votantas e votants. Fingia avant l'entrada da la petizioni vaiva il cumün intervgnü in fuorma d'üna charta pro'l responsabel da la Posta CH AG a Berna. La resposta correspondent nün es intant però amo entrada. La suprastanza ha tut a cogniziun la petizioni.

### **Gruppa da lavur "concept da lavur cun giuvenils - Konzept Jugendarbeit"**

In üna sezzüda in favrer as han radunadas diversas personas da la politica, dal chomp d'educaziun, genituors sco eir ün perit dal post chantunal per giuvenils „jugend.gr“ cun tschinch giuvenils da las duos ultimas classas da scoula. Ils giuvenils han exprimi lur grond giävüscha da surgnir ün local per as inscuntrar, ma eir per pudair discuorrer tanter dad els e forsa eir cun personas creschüdas. La gruppaziun as ha cunvgnüda da metter sü il prüm ün pitschen concept e descriver, suot che circumstanzas cha uschè ün lö d'inscunter pudess gnir drizzà aint per ch'el funcziuna lura eir. Il credit necessari per l'installaziun da la gruppa da lavur e per l'elavuraziun dal concept es gnü approvà. Illa gruppa da lavur vain integrà eir ün rapreschantant da la baselgia.

### **Radunanza cumünala**

In december 2016 ha la suprastanza cumünala fixà las datas per las radunanzas cumünalas dal 2017. La prüma radunanza d'eira terminada sül mardi, ils 25 avrigl 2017. Las tractandas previsas nün han amo pudü gnir preparadas uschè chi s'ha stuvü decider da spostar la radunanza sün lündeschdi, ils 22 mai 2017. La suprastanza giävüscha da tour a cogniziun e dumonda in letta per quist spostamaint.

### **Persunal**

Principi avrigl cumainza Fadri Guler, sco nouv manader da las Gestions Tecnicas, sia piazza da lavur pro'l Cumün da Zernez. A partir dals 1. mai 2017 surpiglia el lura la responsabilità operativa per sia funcziun. Fadri Guler vain introdüt successivamaing da seis antecessur Alfred Barbüda in sias incumbenzas e seis progets. Il manader da las Gestions Tecnicas da fin qua, resta fin pro sia pensiun principi 2018, in funcziun sco silvicultur cun ün pensum redot.

Implü es la suprastanza gnüda orientada da la direcziun operativa sur da l'elecziun d'üna collavuratura per l'administraziun cumünala. Ingaschada es gnüda Giovanna Weber da Scuol. Ella surpiglia in ün pensum parzial (80%) a partir dals 1. gün 2017 l'incumbenza dal secretariat da la direcziun operativa ed üna part illa controlla d'abitants. Per occupar il rest da la piazza da lavur pro'l center da documaints d'identità regiunal es gnüda eletta Flurina Eichholzer da Zernez in ün pensum parzial (20%). Ella aintra in piazza als 1. avrigl 2017. Las duos plazzas rimplazzan l'ingaschamaint da la collavuratura Laura Näff chi ha bandunà l'administraziun cumünala sülla fin da marz 2017.

### **Nouva ledscha da chamonnas**

La suprastanza ha trattà in üna prüma lectüra il sböz da la ledscha da chamonnas chi d'eira gnüda preparada dal giurist. In üna lunga discussiun sun gnüts repassats tuot ils artichels sco eir las propostas per müdamaints cha la direcziun operativa vaiva fat. Causa ils divers adattamaints giavüschats da la suprastanza, es gnü decis da far üna seguonda lectüra da la ledscha da chamonnas avant cha tala vain rinviada a la radunanza cumünala ed a la votaziun a l'urna.